


Dalpeya Cemediyên

Ezîz Gul



HELBEST

cam



Ezîz GUL; Di Serra 1981'ine de Dewa Gistoye ke girêdayî-ya qezaya Erxenî ya de daya xo ra biyo. Gedeyêya xo dewe de vîyarnaya. Di 7 serreyîya ey de keyeyê înan şino şaristanê Erxenî. Hamnanan şinê dewe û zimistanî zî yenê Erxenî. Dibistana seretayî Erxenî de waneno. La Dibistana Mîyanênî nişkeno biwano û fek dibistane ra veradano. Wextêke serrê ey benê 16 reyna dest bide keno û Dibistana Mîyanênî teberî ra waneno, belgeya xo gêno û dest bi Lîseyî keno.

2002-2003'ne de Zanîngeha Selçukî de dest bi wendişê beşa Têkilîya Şarî û Danasîn keno. Di serrî Şaredarîya Girde Şaristanê Edene de xebatkarî keno û nika zî Şaredarîya Girde Şaristanê Amede de xebatkarî xo domneno.

Kasım 2012'ne de bi nameyê "Sorgu Yarına Kalıyor" yew pirtukê ey ê helbestan çap biyo. No pirtukê ey ê diyîn o.

Dalpeya Cemedeyên
Ezîz GUL

AramŞiir

Edîtor:
Abdullah Esen
Semra Birtane

Mizanpaj:
Vin Ajans
Resmê Qapaxî:
Şervan Ekrad

Çapa Yemine: Mayıs 2013

ISBN: 978-9944-222-72-3


Adres:
Aram Basım Reklam ve Yayıncılık
Sanayi Ticaret Limited Şirketi
Huzurevleri Mah. Sıtkı Göral Cad. Kurdi-Der
Binası Kat3/3
Kayapınar / Diyarbakır
Tel: 0 412 238 30 71

email: info@aramyayinevi.com
www.aramyayinevi.com

Çap:
Gün Matbaacılık
Reklam Film Basım Yayın San. Tic. Ltd. Şti.
Beşyol Mah. Akasya Sok. No: 23/A
Küçükçekmece İstanbul
Tel: 0 (212) 580 63 81



DALPEYA
CEMEDYEYÊN
Ezîz GUL



- 7 HESRÎ
8-9 EMBAZ AYTEKÎN
10-11 XELEPÇE
12 ÇI ESTO SE MA XO VÎRA BIKÊ
13 ÊY HESÊ AMED Î!
14 EZ NÊZANA, EZ NÛŞTOX BİBA
15 CİNNETA SEBBEHÎ
16 WEXTO KE TÎ BÎYA
17 HESKERDÎŞÊ ŞİMA NAZIKO
18-19 OMIDÊ ÎNAN ROBOSKÎ DE MEND
20 NO MÊRDİMO GİRD
21 HELÎQOPTER
22 HER ŞEFEQÎ
23 TO RA HESKERDÎŞ
24 EZ KO PÊ HESÊ TO GANÎ BİBA
25 EREKÊ NO BAJÊRÎ
26 EZ
27 TO DİŞMIŞYAYÎŞ
28 HELBESTÊ MİN BÊ TO YÊ
29 REYNA AMEYÎ
30 ŞEWANÊ SİPÎYAN
31 MA ÇI RA REMENÊ KÊ
32 PÊ VARİTE BÊ
33 TÎ KEWTA ZERRÎ YA MİN
34 EZ ŞERMAYENA
35 YEW EZ MENDA
36 ŞİMA KAM CAYÎ DE YÊ
37 DALPEYA CEMEDYEVÊN
38 BÊGÛNE
39 ADİRÊ NEWROZÎ
40 EZ LEWEYÎ KETRANÎ DE YA
41 BÊ VATE Û BÊ PERS

VATE YO VERÎN

Yew roje Bawer maya xo ra destûr wazeno û yew hakê Kerge dekeno binê Ordege. Gama wextê înan yeno hakî şikîyênê û wûçikî yew bi yew hakî ra vejîyênê teber. Yew di rojî nêverdanê leyîrî vejîyê teber. Leyîrî zerreyê keyeyî de weye benê.

Çend rojan ra pey ordege û leyîrî veradîyenê teber. Bawer wîçikan ra ewnîyeno. Û ordega maye hetê seya awe şina û leyîrê aye, şopa aye ra şonê. Maya înan dekewena awe. Wîçikî verî kilkilyenê(tereddût) dima ra yew bi yew dekewenê awe û yo ke hakê kerge ra vejîyayo newba ey yêna. Bawer nameyê ey Zere nawo pa.(panawo) û ma zî ey ra Zere vajê.

Zere nêhewteno dekewo awe û tena kinare awe de vindeno. Yew aver yew apey şino, o xo şidêneno, kom keno û xo veradano mîyanê awe lingê ey erdî ra hewanenê ca de dekewno miyanê awe , awe dekewena qirika ey û xo bi zorî erzeno teberê awe. Bê nefes maneno û vejîyeno yew kerra ser û ser kerra ra birayanê xo temaşe keno birayê ey awe de esnaw kenê û ey nişkeno esnaw biko û tena teberê awe de maneno û birayê ey awe ra nêtersenî labelê Zere ça bi bixeneqîyo. Zere tersan ver ra bermeno û maya ey xem nêkena û nêna hetkarîya ey. Zere famkêno ke çîyo ke şaşkî şino. Labelê çi, çi samedî ra enewa beno ey yew vate (max-ne) nêşkeno bido û nişkeno tira mîyan ra vejîyo.

Ordege her roce şina gole û leyîrî pêro pîya esnaw kenê labelê Zere mil deraynaye pawena. Tira pey mar ey fetel-neno , o no samedî ra xo mergî ra zor xelesneno. Û kinarê çemî de ge çereno ge bermeno ge ge zî rakeweno.

Roca vêrenê, leyîrî pûrtê xo rişnenî, tewêrna benê û wextê organîkî resenê. Pûrt, pirnik, ling û vengê Zere ê birayanê xo ra tewêrna beno. No sewbîna bîyayîş(bedilnayîş)

Zere enewa fikiryayîş û hinzar û yew persî yenê Zere vîrî, tira pey Zere vano ez kam a ?

Û geyreno rêçê kewmê xo. Dewe de kergî estbî raray şînê hetê înan, çendêke şino hetê înan ewnîyeno ke înan maneno . O kergan reyde hîna weş pêkeno. Kergî nêkewenê awe vera vera birayanê xo ra dûrî keweno. Zere birayanê xo nêmaneno , ê henekanê xo kaydê ey kenê . Û ey sey birayê xortî vînenê no rewş(hal) zerrîya ey zaf dejneno û birayandê xo rê zerreyî xo de vera vera derdê înan gird keno. Û yê min nêgenê mîyanê xo Ez zî xo rê tena bimana û Zere xo tena verdeno. Û mezgê xo de persan virazeno.

Zere vera vera gird beno û beno dîk , fam keno ke ordeğ nîyo û kewmê kergan ra nêameyo.û kergan reyra cuwîyeno û şino pûnikê înan û kergê makî weştê ey şînê. Ordeğ serranê xo ê girdan de fam kêno ke maya ey, ey weye kerdo û kewmê kergan ra yo.

Hem ziwanê ordeğan hem zî ziwanê kergan mûseno, hem cuyê ordeğan hem zî cuyê kergan museno. Cuwîyayîş û fikiryayîşê ey hem ordeğan hem zî sey kergan o. Di ziwani, di kulturî û di cuyî ey benê û hem kergan hem zî ordeğan ra hes keno.

Gedeyê kurdan serranê kijekan de dibistanan de tirkî musenî. Dibistananê Tirkan de her wext vanê şima tirkî û sûwend înan danê wendiş . Gedeyê kurdan bîyê tirk tewr vernî ra asîmîlasyonî fem nêkenê. Çendêke gird bibê ay wext mezgê înan de tay tewir persî û bedelyayîş ca gênê.

Û fam kenê ke ey tirk nê kurd î. Kurdkî nêzanê la fam kenê ke kurd î. Nara zî fam kenê ke ameyî xapênayîş , înan rê zûrî ameyî vatîş . Û no xapênayîşî reyde bi verbê no polîtîkaya asîmîlasyon ya nêhesimnayîşî vîndenê û şer kenê.

Zere verî xo ordeğ hesebneno dim ra gird beno û ewnî-

yeno ke pûrtê ey ordeğ nêmaneno û fam keno ke kewmê kergan ra ameyo û no halo raştîyên (raştîkî) gineno mezgê ey ro. Mezgê Zere têmeîyan keweno û xo rind nêhesebno. Gedeyê kurdan sey wûçîkê Zere mezgê xo de xo hesîyenê û gêreno kewm û ziwanê xo.

Şerê ma yo ke ma seba ziwanêke birûmet danê zî mane-
no cuya Zereyî.

HESRÎ

Hesrê ke ginenê ganê to ro û to dejnenî
Bizane ke zerrîya to de yew heso bermîyaye esto
Û qet yew hesra ke bê armanç varit reyra nêvarena
Gama ke yew qesba leqiyaye, asmên gureno

EMBAZ AYTEKÎN

Aşme emşo zor akewte
Tarî kewtbi şewe ser ro
Yew şewa zaf tarîyên bî
Çim çimî nêvînaynî
O ti bîyî?
Der û dorê mergî de
Yan zî
Bi zorîya Asme de
Yan zî
Tarû dê asme de?
Ti rayîr şîbî.
Ti geray bî?
Tarû de
Barkerdişê roşnayîya xo de
Kê vanê qey ti mergî gêrenî
Sey yew xezala birîndare
Recîfîyayîşê to yo?
Rûniştêye
Rûnişt zereyê ma de
Yan zî
Recîfîyayîşê ma bi?
Barbibi mîyaneyê to de
Ero kaykerdoxê taximê bînî
Ti bizanî ke hûwîyayîşê to
Bîyayîşê yew gule de nimateye yo.
Zimbêlê to
Sey yew viraşteyeyê neqşên o
Çimê to
Sey yew deryaya kewe û gula azadîye yê

DALPEYA CEMEDYEYÊN

Ewnîyayîşê to
Bi yew seya azadîye yo
Cayê to zî
Rîpelê tarixî de tewr cayî berzî de yo

XELEPÇE

Roce, yew roce wesarî bî û roja yew şerrî ra dim ra bi
 Xelepçe ver bi koleyî sereyê xo awanabi
 Destê xelepçe acor kerde yê û qîrayî vatbî ma
 azad bîyê!
 Û yew veng ame
 Verî helîqopteran dima ra zî tîyaran merg eştbi serê
 xelepçe ro
 Yew boya weşe ameye, boye sey boya yew saye
 Dima ra zî boye, biye boya jehrên û yew ters û lertz
 ame xelepçe ser o vila bi
 Boykerdişî, mergî ard mergî zî zerreyê xelepçe veşna
 û meyitê helepçe di erdî de mendî
 Herra meyitanê xelepçe boye kena û gona xelepçe
 şimena
 Fek û pîrnikan ra zî vatişê azadî rişiyêne here ser
 Asmên bindê qêrin û nalîn de mendeye yo
 Zerreyê çimanê leyîranê kijekan de roşnayî perraye
 serê dinya-serê xelepçe
 Hûwîyeyîşê leyîranê kijekan, boya vilike eşt pîzeyê
 xelepçe
 Û yew ewnayîşo azad mend
 Çimî bê roj
 Fekî bê awe
 Pîzeyî bê nan mendî
 Dinya bî tarî
 Û meyitê inan herra xelepçe de kewteye mendî
 Vengê dayikan û qêrîya tûtê kijekan
 Bêvengîya homayî de
 Xelepçe vilika azadî de û deyrê welatî de azad bîye

DALPEYA CEMEDYEYÊN

Şaristan, xerebe bi, bê dare û bê vilikanê azadî mend
Yew çîyo ganî qet nêmend
Mêrdimeyî amey qetilkerdiş
Şerrî heskerdoxan rê, qetilkerdişî rê goş û çimê xo
padaybî
Erd û asmên bê veng mendeye bi
Hişbeye, qilûz û pilisyaye mendbî
Merdimêya erd û asmênî na roje ameye vatiş
Êgîdêya na dinya na roca tarîyên de ame nûştiş

ÇI ESTO SE MA XO VÎRA BIKÊ

Şima min ra pers bikê
Wa ey hişbê
Wa qet vacêr nêbê
Ma xo bi xo qal bikê

Wa şewe yew şewa zimistanî bibo
Ma sobeyê xo panê
Qehran, qalnêkerdişan, neyaran
Ma biberzê sobeyê xo
Ma pêrînan biveşnê

Ma germin bê dormareyê ey de û qalan bikê
Labelê şewe wa bibo derg
Ma demo vîyarteyî de vînî bibê
O ma vernîya xo ra biewnîyê
Çi ciwîyeno se wa biciwîyo
Ma xo bi xo qal bikê

Ma hewrê sîyayan ver ro tîje bibê ke
Wa hewrî vila bibê
Wa eyema ma akerde biba
Heme çî wa akerde(Zelale) bibo
Qet wa şewe bêaşme nêmano
Ma heme çî xo vîra bikê
Çi esto se ma birişnê
Wa di zereyî ma de nêmano

ÊY HESÊ AMED Î!

Hişbîyayîşo bêvêngin yew behrî de
Qêrîya to hişbîyayîşê to de nimeteye ya
Destê to acor dê û rika to zî rika azadî ser şîyayîşîyan
Sey dayikan ewnîyayîşê to dormareyî ma girewto
Verî ewnîyayîşanê to dima ra zî rika to
Deşt û koyan bindê seya sîyayan de verdayo
Barê to yo giran zî ame zerîya û dilê ma de rûnişt
Êy hesê amedî!

EZ NÊZAN A, EZ NÛŞTOX BÎBA.

Ay veşeteyîşanê ma
Vengê ay fîşegan
Koçî, ay terkîwetenan
Nêhesibyayîşanê ma
Wa min nûşttoxê înan bikê
Wa min ra vacê yew bi yew binûse

Ê wa vacê ke
Koçkerdişê ma bêsebeb nêbi
Ma veşayê
Ma ameyî veşnayiş
Aye heme çî, wa min vîrî bikê
Wa ê vacê, ey nûşttox! Binûse
Qet ez nêecizyena, ez nûsena
Wa ê vacê, resmê înan xêz bike
Belkê ez ancî xêz kena
Belkê ez yew nûşttox a
labelê
Ez ciwîyaya.
Min dî
Ez şîna zî xêz bika
Sey nûştişê xo

CÎNNETA SEBBEHÎ

Ti çin a, ti durî de ya
Ti hendê estaran durî ya
Ez bîya erdkêşî
Min nêşêna to kaş bika xo
Ti nêkewta min ser o

Ez bîya varit
To, Ez nêvarnaya xo ser o
Di tasa mevlanayî de
Ez bîya varanê Avrêle
To, min nêşimit

Ay wext

Ti
Di bihûşt(a)(Cînneta) Hesênê Sebbahî de
Yew hûrî
Ez zî
Di teberî de yew gongorîye pawîtoxê mergî xo ya
Wa xençera xo zerra min de bicikîno
Wa leweyanê qeytranê berzan ra min bierzo
Wa ez bîmira ke
Bikewa bihûşt

WEXTO KE TÎ BÎYA

Awe ke bindê pirdî ra yêna.
Ti sey awe pêlî rişiyaya zereyê min
Ez bîya pirdo kerrayên
Ti min serî ra şîna
Çemê wirdekî ser ro
Heme cayê min sey têlê asinên girêdaye
Sey pirdê deleknayeyî ez lekyena

HESKERDIŞÊ ŞİMA NAZIKO

Heskerdişê şima nazik o
Sey layê cambazî
Barî yo
Çetin o serî ra gêrayîş
Koyê ey est o
Berz o
Xêz-xêz, çepraşt têver ra şino
Şewa tarî de rayîrê xo gêno
Roj akewt se rakewno
Bêveng maneno
Xo kaş keno terha/kafê xo

Heskerdişê şima nazik o
Azad o
Koyanê berzan ra veng dano
Adir beno
Dijin beno
Serdê şewa vewrine de vareno
Sebir o
Fîşeg a
Zereyî ma de yew heskerdişê ideolojîkî yo

OMIDÊ ÎNAN ROBOSKÎ DE MEND

1

Ê cayê vînîbîyaye ra nêameyî ewta
Cayê Nuhî de, Cayo ke tarixî ra mendeye bi
Ê hemverê Cudî de henzar serrî yo
Yew ciwîyeyîşo pîneyên de ciwîyenê

Kamî no şoreşî pîzeyî xo de
Şênayî nêverdabi ke nêşîbi
Nê koyan
Sereyê xo hawanabi semedê ê ke înan nêhesebnabi
Vace ! Ma kamî?

2

Tay bînî zî nanê xo dima ra
Rayîrê hûzûrê xo de bîyê
Nê koyan de
Yew ciwîyeyîş bi, dima ra vazdeyîşê înan
Bêaşme yew şewa tarî de, Ca 'Ulu'dere bi
Cayê Nuhî de
Hema newe biharê xo de ciwanê tezeyî 34 omidî bîyê

Eşkenceyê fekîrê eştbîy paştîya xo
Şewa tarîye xo rê kerdibî yew omid
Înan omid mabenê xo de barkerdibi, kewtibî rayîrî
Omidê înan leşanê înan de mend
Leşa xo parçeyî şarapnalan de
Sey yew egîdê ciwanî veredaye

3

34 omidî, endayî zî kerwan de ganî bîyê
omidê ke rayîrî de şinê, ê ganî bîyê fermanê qetlî
Pê 'Bombeyê gazan'î veşnayîş o?
Fermanê qetlî? Camêrdeya înan
Wa bizanê ke, Camêrdeyî nîna înkâr
Her wextî de ma vîrî de ya

Ey fermanê qetlî!
Ti nimajkerdişê zûreyênî û sextekarîya xo de bîmane
Besteyê kifiran neqîş bîyê ser ziwanan de
Semedê qirkerdişê 34 omidan

NO MÊRDÎMO GÎRD

Ti kewnê vîrê min
Sey vîrkewtişê Şems û Rûmîyî
Kê vanê qey, ez çarmihî ra girêdaye ya
Binê linganê min ra dalpeyê gûnî rişîyenî
Çimê min padeye yê
Hêşê min şîyo Hallacê Mansûrî
Kê vanê qey, ez Îsayî ra qewet gêna

Çimê min akerdeye yê
Ez ewnîyena dormareyê xo ra
Wext(Dem)
Hendeyî zî mêrdimî dejneno
Mêrdim
Endayî zî însanî şermizar keno
Û ez sey Zerduştî qêyrena
Ti kotî yî

HELÎQOPTER

Hele bê hele bê min hete
Nefesê xo bigî û verade
No talankerdişê to çi ra yo
Rijînayişê to çi ra yo
Ay bombeyan
Vaji, qal bike ke ez zî bizan a.

Qerezê ay bombeyanê xo
Vaje û qal bike
Namenişanê ay fişeganê xo
Vaje, qal bike
Ay koyo ke to xo rê kerdo armanc
Vaje, qal bike hele...

HER ŞEFEQÎ

Her Şefeqî
Pê yew akewtişê tîje ra dest pê keno
Ez extîyar bena yew rojî hewna
Her şefeqî
Sey yew celladî beno
Rojê neweyî nawêneno ma
Labelê
Rojê ma, ma ra girewto zî

TO RA HESKERDÎŞ

To ra heskerdiş
Sey hetê adirî de vindertiş o
Hesê to sey yew adirî yo!
Di dormareyî xo de çêleyan verdêno
Çêleyî veşenî benî wele
Va wele vila keno
De bê kom bike, eke ti eşkena se kom bike

EZ KO PÊ HESÊ TO GANÎ BÎBA

Ti seba çi rewşa min pers kena
Ez vana qey, ti nêpersa se hîna baş beno
Labelê ez zerreyî xo ra
Hîrê çî vaja to ra
Ez hesê to reyde ciwîyena
Hesê to ra ez ko bimira
Roca xerepyayîşê dinyaye de
Qaydê hesê to rê ez ko gonî biba

EREKÊ NO BAJÊRÎ

No bajarî de
Eke ney şaristanî de ma têna mendî se
Erekê no bajarî ma yê se
Ma do hîbîyayişê xo vîr bikê
O ma ganî vejîyê kûçeyan
O ma vengê xo berz û berz bikê

DALPEYA CEMEDYÊYÊN

EZ

Ez, to
Roj awan de
Leweyê tewr berzî ra
Zerra min veşateye
Ewnîyayişê yew gule pilisyaye de
Ez to ona temaşe kena!

TO DIŞMIŞYAYÎŞ

To dişmîşyayîş
Sey yew adirî serê min ro vareno
Ez tersena ke ez veşyayîşê to reyde zûwa biba
Û awe biyayîş kewno min vîrî ra

HELBESTÊ MÎN BÊ TO YÊ

Asme tarî ya
Estareyî hewnakerdeye yê
Helbestê min bê to yê
Ez nêzan a. Ez binûsa yan zî nênûsa

REYNA AMEYÎ

Ê reyna ameyî
Cayê hewnê min ê tewr xorîn de
Oxrê ke emşo min padayîbî
Heme berî û perdeyî
Seba ke emşo zî wa nêrê

Ez reyna êrzîyena
Cayê hewnê xo yê tewr xorîn de
Ez goşanê xo padana
Ez vana wa vengê fîşegan nêyero min
Ez emşo reyna hewnî ra xohesîyena
Pê vengê fîşegan
Ez reyna qêrî bena
Di nêmeyê şewe de

ŞEWANÊ SÎPÎYAN

Oxro ke ez
Di Şewanê sipîyan û vewrinan de
Di varitişê pelê vewra qêrarîne de
Ez qayîla ke, şewa to ya germine de
Ez xo germin bika

MA ÇI RA REMENÎ KE

Ma no welatê xo ra
Çi ra remenî ke
Çi zelzele ra
Çi zî rasêlî ra
Kê vanê qey qeder bîyo
No cayan ra şîyeyîş
Miyane toz û dûyî de ma biyê korbeye
Çonkirêka(kirêk) ma veşnayîbî
No welatî ra remayîş

PÊ VARÏTE BÊ

Ti zana? Ti her wext min vîrî de ya
Ti zerrîya min de ya û ez hetê çemî(royî) de rayîr şina
Çem(Ro) ewneno min ra û ez ewnena çemî ra
Zerra ma wirdînan zî keyfweş nîya
Xeyalê to min rê biyo rayber

Çimê min hêsr benê
Wexto ke ti yena min vîrî ra
Ez wazena ez destanê to pêt bi pêt bitepşa
Û hetê çemî de to bideka verêka xo

Kê vanê qey çem pêl-pêl bîyo
Kê vanê qey gineno leşa mina cemîdîyaye ra
Ez bêhêş menda şîyeyîşê to her wext min vîrî de yo

Heme ca hî beno
Û çimê min zî hî benê, semedê şîyayîşê to ra
Ez wazena ez gêj-gêj bigêra
Ez vaca Meşo! Meşo!

Ez hinî nêşena xo bişinasna
Dejê min girs beno
Şîyayîşê to zor dano min

Ka ez vana yew mîlçike biyêra min hete
Şîyayîşê to ra pey veşîyayîşê min o ke nûşteye
Yew mektubî wa ez bida fekê mîlçike
Wa ez vaca bigîre biyere welatê waştîya min
Û ti sey varita avrêle
Yew ray de apey biyêra

TÎ KEWTA ZERRÎ YA MÎN

Wexto ke ti kewta zerrîya min

Ewta de

Roj awan ra dime

Şewî û saetî pê linganê wirdekan ra rayîr şinê

EZ ŞERMAYENA

Sey Zerdûşt î.

Ez kafê/terha xo de pawena.

Kê şênê xo homayî biresnê?

û ez çi qasî dekewa mîyanê mêrdiman

Ez xo ra

û mêrdimanîye ra şermayena

YEW EZ MEND A

Yew ez mend a
Di kûçeyê waştîyayanê multecîyan de
Serd bi serdê yew şewa zimmûgî de
Xeyalê sey yew çaya germine de
Ez to ana şimena

ŞİMA KAM CAYÎ DE YÊ

Tîje gêyrayiş
Hetê to ra ameyiş
Qet min vîrî nêkewtêne
Demî
Min dejnaynî
Mêrdiman
Zerreyê min veşnaynî
Di wextê yew mergî de
Ez qîjena-qîrena
Ey mêrdimê dinyayijî!
Şima kam cayî de yê

DALPEYA CEMEDYEYÊN

DALPEYA CEMEDYEYÊN

Zerrîya min yew şewa zûmûgî de kewta to?
Yan zî şewa zûmûgî ra mendeye ya
Yew dalpeya cemedyeeyên bîye?
Ameye ez bêhêş tepiştâ
Zerreyê min de ya dalpeya germên û cemedyeeyên bîye
Ez veşnaya û ez cemednaya

BÊGÛNE

Ez bêgûne ya zereyê mezgê min de hesê min
Min qaydê to rê zereyê xo de hesê to viraşt

ADIRÊ NEWROZÎ


Hesê mezgê û zerrîya min
La to adirê cudî êşt pîzeyê min
To qêrîya Qatoyî kerd qêrîya min
Meşaleya cizîra botan kerde min destî
To ez koleyê zilmî ra azad kerda
Ez nika zî, her wext adirê newrozî de veşena

EZ LEWEYÊ KETRANÎ DE YA


Ez Leweyê Ketranî de ya
Heskerdişo betilyaye barbîyo ganê min ro
Binê yew asmênê kewe û keweyên de
Erd çabo bivêt beno
Ez rihê xo yê helbestînê reyde vin bena
Ez tenaya û betilyaye ya.


BÊ VATE Û BÊ PERS


Qêrîya min yew xezala serê koyan a
Hewsarê min ewnîyayîşê to yê qefelyayeyî de mend
Û ti min kaşkena koyanê xo ser
Ez bê vate û bê pers yena...
















“ DALPEYA CEMEDYEYÊN

Zerrîya min yew şewa zûmûgî de kewta to?
Yan zî şewa zûmûgî ra mendeye ya
Yew dalpeya cemedeyên bîye?
Ameye ez bêhêş tepîştâ
Zerreyê min de ya dalpeya germên û cemedeyên bîye
Ez veşnaya û ez cemednaya

